

# Fasnacht '07

Im Stadtcasino loost me aadachtsvoll dr Kammermuusig zue,  
Dr Steinebärg isch teert und gfädret, ändlig herrscht dört inne Rue.  
Nach kurzer Freud wird aber s Publikum vo neuem Ärger paggt:  
Au ohni Trämli bebbt jetzt d Ärde im Minutetaggt.

Dr Blocher dankt: „I bach mol Muffins für d'Kollege, die hänn's gärn.“  
Do längt är voll ans heisse Backbläch; Aua, aua, gällts dur Bärn.  
D Micheline hörts und meint: „Dä Ofe het mit Politik vyyl z due,  
Christoph, loo bi heisse Yyse besser d Klappe zue!“

Die neu Miss Schweiz, lägg isch die öd, die weggd bi uns vier keini Glüscht.  
Uns hätt die Xenia besser gfalle, well die hett so schöni AUGÉ.  
Drissig Joor Emma ändre nüt und mir ziehn schlicht nur no d Bilanz:  
D'Alice Schwarzer het scho rächt, mir dängge mit dr RÄCHTE HIRNHÄLFTI!

Well dr Permafroscht bigoscht bald fählt stöhn d Bärger jetzt im Seich,  
Dr Eiger bröckelet und s Matterhorn wird au scho langsam weich.  
S Heidi seit zum Peter „Los, hert du die Alpe mit Chemie,  
Und rybb sen als wennis z weich wird eifach mit Viagra yy.“

Wells s Buech zum Film scho git isch es für d Gigi Oeri nur e Schritt,  
Dass es scho gly zum Kaufen au en eigni Parfumlínie git.  
Au für dr FCB do proobt sy amnen eigne Parfumdúft  
Und hett als erschts dr Draum vom Meischer in dr Luft verpufft.

D Gegner hänn Angscht vom Walujew, well dá isch hoorig, stark und fett.  
Dr eint hett so viil Schiss ghaa, dass d Kneuschibe d Flucht ergriffe hett.  
S nögscht mol wenn mir vier wänn Wältklassboxe live in Basel see,  
No kaufe mir Biljee fürs Meischterspiil vom FCB.

„Das Polatrium wo d Lütt vergiftet, isch mir z diefscht suschbäggt.“  
„Du meinsch Plolonium, denn s ander ischs Geotermin Projäggt.“  
„Jä nei, s isch andersch.“ „Aber wie?“ „Jä weiss do keine was das soll?“  
Dasch vo dr Heute Redaktion e Sitzigsprotokoll.

Dr Roger Federer, das Tennis-As, dr Held vo dr Nation,  
Für alli Sportler het sy Ballgefühl schyyns e Vorbildfunktion.  
Är drescht die Bäll knapp übers Netz nur s einzig wo uns dra verdriesst,  
Gnau glych sehts us wenn Schwiizer Nati als Penalty schieisst.

Isch sy bi de Hare Krishna, macht sy Wärbig für Gilette?  
Was isch dr Grund dass d Britney Spears sich yri Hoor abschnitte hett?  
No hänn mir tscheggt „Wow, that's a statement!“ die Frau hett ganz ungeniert,  
Als Kommentar zur Politik dr Bush grad wägrasiert.

## Swissair-Soda

Im Swissair Kader dien sy wichtig,  
risse d Schnuren uff, ojeminee.  
Und denn in Bülach sinn sy lislig,  
Y glaub dört schwätzt gar keine mee.



Nur dr Corti redet wyter,  
Lächlet z friide wenn är dänggt:  
„Obwohl dank mir Milliarde futsch sinn,  
Für mi goldig Fallschirm hetts no glängt.“

Was leere mir jetzt us dämm ganze?  
D Moral die isch an sich no cool.  
Dä Prozäss bewyyt eidütig,  
Au e Zürcher hoggt emol ufs Muul.

# Die Aabrennte

[www.aabrennte.com](http://www.aabrennte.com)